



Serbisu Militar Obrigatóriu iha Timor-Leste?

(Mahein Nia Lian Nú. 53, 27 Maiu 2013)

“Versaun Tetun no Ingles”



Fundasaun Mahein (FM)

Relatoriu Ida ne'e Suporta Atividade Departamentu Harii Paz no Koezaun Sosial ho Suporta Orsamentu husi UNDP Timor-Leste no EmbaxadaFinlandia iha Jakarta



Website: www.fundasaunmahein.org



Versaun Tetun

Kontiudu sira

Kontiudu sira	2
Introdusaun	3
Enkuadramentu Legal: Kompetênsia Prezidente Repúblika no Governu	3
Dokumentu Polítika Governu Hatete Saida Kona-bá Militar Obrigatóriu?	4
Oinsa Prespetiva Estratéjika Kona-bá Polítika Defeza?	6
Konkluzau	8
Bibliografia	10

Introdusaun

Hodi realiza promesa ne'ebé halo tiha ona iha kampaña prezidensial, Presidente Repúblika Timor-Leste estabelese ona ekipa ida hodi halo sosializasaun no estudu kona-bá serbisu militar obrigatóriu. Objetivu husi relatoriu ne'e hodi kontribui hanoin ruma kona-bá programa serbisu militar obrigatóriu liu-liu atu dezafia programa ida ne'e. Fundasaun Mahein (FM) kestiona ho razaun ne'ebé apresenta kona-bá introdusaun serbisu militar obrigatóriu iha Timor-Leste.

Bainhira Sr. Taur Matan Ruak (TMR) sai nu'udar kandidatu ba Presidente Repúblika ba periodu 2012-2017, kandidatu TMR artikula serbisu militar obrigatóriu nu'udar programa prinsipal ida ba programa política kandidatu ne'e nian. Durante tempu kampaña, kandidatu TMR defende katak serbisu militar obrigatóriu nu'udar programa kampaña número lima. Programa ne'e sai tiha ona nu'udar mehi ida kleur TMR nian, tan iha tinan 2007-2008, bainhira TMR kaer hela Komandu F-FDTL hatama proposta programa ne'e ba iha Parlamentu Nasional no Governu iha tempu ne'eba hodi hetan aprovasaun.¹ Maske, ikus mai laiha resposta ruma husi Governu no Parlamentu Nasional ba proposta TMR nian ne'e.

Bainhira kandidatu TMR eleitu nu'udar Presidente da Repúblika (PR), hahu dudu programa ne'e. PR estabelese ona ekipa ida ne'ebé lidera husi Gabinete PR nian hodi halo estudu komparativu no konsultasaun.

Iha razaun prinsipal tolu tansa FM kestiona ba programa serbisu militar obrigatóriu. *Dahuluk*; tan razaun enkuadramentu legal, *daruak*; tan razaun prioridade política Governu nian kona-bá área siguransa no defeza, *datuluk*; tan razaun estratéjiku. Parte tuir mai iha relatoriu ne'e sei analiza no dezenvolve razaun sira ne'e hodi reforsa argumentu sentral relatoriu ne'e katak laiha razaun fundamental no klaru kona-bá programa política militar obrigatóriu husi PR.

Enkuadramentu Legal: Kompetênsia Presidente Repúblika no Governu

Serbisu militar obrigatóriu ne'e no kualker política defeza monu liu ba iha kompetênsia ezekutivu, la'os kompetênsia PR nian hodi formula fali política defeza nasional. Tuir lolos, iha kampaña kedas, programa serbisu militar obrigatóriu labele sai nu'udar programa política PR nian, lolos Governu maka iha poder tomak hodi defini postura forsa defeza iha Timor-Leste.

Tuir Konstituisaun RDTL, Artigu 74 (Definisaun) hatete katak:

1. *Presidente-Repúblika maka Xefe-Estadu, símbolu no garantia independênsia nasional no unidade Estadu nian, no instituisaun demokrátika sira-nia funsionamentu regulár.*
2. *Presidente-Repúblika maka Komandante Ass liu Forsas Armadas nian.*²

Tuir Konstituisaun RDTL Artigu 103, Artigu 107, no Artigu 108 hatete momos katak Governu maka iha responsabilidade atu define política no programa jeral nasaun nian.

¹Jornal Independente, Segunda 15 Marsu 2012

² Konstituisaun RDTL Versaun Tetum

Iha mos Lei Nú. 2/2010 de 21 de Abril Lei de Sigurança Naçional define ho hafahe ona ho klaru funsaun entre PR no Governu.

Iha Artigu 21 Lei Seguransa Nasional ne'e dehan katak PR ne'e iha deit kompetênsia hodi halo kontrolu ba sistema integradu ba siguransa nasional no reforsa tan deit kompetênsia sira ne'ebé hatur tiha ona iha Konstituisaun RDTL. Iha Artigu 23 defini ho klaru kona-bá knáar Governu nian ho formula polítika siguransa nasional.³

Haree husi padraun legal no konstitusional sira ne'e, PR laiha responsabilidade kona-bá formulasaun polítika defeza no siguransa nasaun nian, maibe, Governu maka iha poder tomak ba área ida ne'e. Ne'e katak programa ne'e lahan-malu tiha ona ho mandatu konstitusional nian ne'ebé ko'alia kona-bá separasaun poder ba xefe estado no orgaun ezeutivu. Maibé, oinsa ho prioridade polítika defeza no siguransa Governu no programa militar obrigatoriu ne'e?

Dokumentu Polítika Governu Hatete Saida Kona-bá Militar Obrigatóriu?

Dokumentu polítika ka *defence policy documents* ne'ebé ko'alia kona-bá área defeza maka: Dokumentu Plano Força 2020, Planu Estratéjiku Dezenvolvimentu Nasional no Programa V Governu Konstitusional 2012-2017. Dokumentu sira ne'e la temi ho kle'an kona-bá serbisu militar obrigatoriu iha Timor-Leste. Entaun, oinsa programa serbisu militar obrigatóriu PR bele iha ligasaun ho dokumentu polítika ezeutivu nian?

Iha dokumentu Plano Força 2020 ne'ebé Prezidente TMR maka inisiador bainhira kaer hela Komandu F-FDTL la estabelese postura forsa defeza militar obrigatóriu ida, dokumentu ne'e la hamosu argumentu ruma ho detallu kona-bá importânsia ba Timor-Leste hodi introdus konseitu serbisu militar obrigatóriu iha pensamentu estratéjiku nasaun Timor-Leste. Iha deit liña tolu resin iha pázina 136 koalia nune'e:

"In the event of Compulsory Military Service is the chosen option, it will be advisable to create a small-scale domestic defence industry, with the aim of producing uniforms and footwear, dry rations, munitions and other military articles and basic necessities for use in training and development"(Força 2020, pájina 136).⁴

Tradusaun la'os ofisial:

"Iha eventu bainhira servisu militar obrigatóriu mak sai nu'udar opsaun, karik bele kria indústria defeza nasional kiik ne'ebé ho objetivu hodi halo produsaun uniforme no kalsadu, rasaun maran, munisaun no artigu militar no nesessidade bázika hodi uza iha treinamentu no dezenvolvimentu".

Parágrafu ne'e iha sentidu prinsipal ida katak Plano Força 2020 lataka dalan ba Estadu hodi hamosu serbisu militar obrigatóriu iha Timor-Leste. Dokumentu ne'ebé la'os deit sai matadalan ba dezenvolvimentu forsa defeza ba tinan lima, maibe tinan sanulu resin, tanba

³ Lei Nú. 2 /2010 de 21 de Abril Lei de Sigurança Naçional

⁴ Força 2020, pájina 136

ne'e, tuir lolos artikula ona ho kle'an kona-bá importânsia introdusaun serbisu militar obrigatóriu. Dokumentu ne'e la konsege, signifika katak TMR ne'ebé nu'udar inisiador ba dokumentu Plano Força 2020 lahare katak Timor-Leste presiza ema hotu-hotu tama iha militar. Programa ne'e la'os mosu deit nune'e, tenki iha mudansa jeoestrátjiku ruma ne'ebé dramátiku tebe-tebes iha rejiaun ne'ebé sisi Estadu hodi mosu ho konseitu serbisu militar obrigatóriu. Maibe, iha rejiaun liu-liu nasaun viziñu Indonézia ne'ebé identifikadu nu'udar ameasa externa boot iha dokumentu Força 2020 iha mudansa boot tebe-tebes iha demokrasia, ekonomia no liu-liu mentalidade lideransa iha Indonézia. Situasaun jeoestrátjiku iha nasaun viziñu sira avansa tebe-tebes, maibe, pensamentu estrátjiku hodi hamosu planu serbisu militar obrigatóriu halo fali *marça atrás*.

Planu Estrátjiku Dezenvolvimentu Nasional (PEDN) mos uza nafatin Plano Força 2020 nu'udar matadalan hodi kondus Governu iha esforsa profesionalizasaun forsa defeza. Ne'e katak, pensamentu estrátjiku ne'ebé hatur tiha ona iha Plano Força 2020 sei sai nu'udar dokumentu úniku iha dezenvolvimentu estrutura forsa defeza. Iha pázina 167 PEDN hatete nune'e:

"The strategic study 'Force 2020' is Timor-Leste's model for the consolidation and development of F-FDTL....."(PEDN, pájina 167).⁵

Tradusaun la'os ofisial:

"Estudu estrátjiku 'Força 2020' maka sai nu'udar modelu Timor-Leste nian ba konsolidasaun no dezenvolvimentu F-FDTL.....".

Ne'e katak to'o tinan 2020, Timor-Leste sei laiha tan ona konseitu estrátjiku seluk kona-bá dezenvolvimentu F-FDTL.

Programa V Governu Konstitusional sai nu'udar tradusaun husi PEDN, no iha kontektu defeza nian, programa ne'e sai nu'udar tradusaun husi Plano Força 2020 ne'ebé estabesidu tiha ona desde tinan 2004. Iha Programa V Governu Konstitusional ne'e liu-liu iha parte defeza nian identifika buat sira ne'ebé ho natureza transnasionais ne'ebé bele hamosu impaktu negativu ba siguransa⁶ hanesan krime organizadu, tráfik ba droga, terrorismu, degradasaun ambiental, mudansa klimátika no dezastre natural sira.⁷

Iha exersísiu formulasaun polítika defeza Estadu ida nian, ameasa no interese estrátjiku maka determina estrutura forsa defeza nian. Haree ba ameasa ne'ebé temi iha programa ne'e, bele dehan katak laiha ameasa konvensional extraordináriu ida ne'ebé obriga Governu hodi halo planu re-adjustamentu ba modelu forsa defeza Timor-Leste.

Bazeia ba análise kona-bá dokumentu polítiku Governu nian ne'ebé iha mandatu konstitusional hodi defini polítika defeza nasional Timor-Leste la temi buat ida kona-bá serbisu militar obrigatóriu iha Timor-Leste. Tan ne'e, bele foti konkluziun katak programa

⁵ Planu Dezenvolvimentu Estrátjiku Nasional – PEDN - 2011-2030

⁶ Iha mos observasaun ida katak mudansa klimátika, degradasaun ambiental no dezastre natural ne'e konstitui ameasa ba siguransa, tan ne'e parte ne'e tuir lolos tau prioridade ba ameasa ne'ebé sisi intervensaun F-FDTL tuir mandatu Konstitusional, artigu ne'e bele hare iha: *Francisco Lemos Dos Santos, Programa V Governu latemi kona-bá polítika defeza foun ba Timor-Leste!* bele asesu iha: <http://forum-haksesuk.blogspot.com/2012/12/programa-v-governu-latemi-kona-ba.html>

⁷ Programa V Governo Constitucional Nian, 2012-2017, pájina 71.

serbisu militar obrigatóriu ne'ebé nu'udar programa política PR nian lahan-malu ho programa política Governu nian.

Oinsa Prespetiva Estratéjika Kona-bá Política Defeza?

Tuir perspetiva estratéjika, rasionalizasaun kona-bá introdusaun militar obrigatóriu ne'e mukit hela. Sr. Frei Guterres, Aessor ba Casa Militar Prezidencia Repúblika haktuir nune'e:

"S.E Presidente Repúblika hakarak implementa programa serbisu militar obrigatóriu ba foin-sa'e sira iha programa ida hanaran "Sidadania Sívika Patriota (SSP) ne'ebé iha objetivu hodi hasa'e sentidu nasionalismu no patriotismu, atu nune'e, kontribui ba defeza soberania no integridade territorial nasaun nia". Sr. Frei Guterres mos hatutan tan katak programa ne'e sei "haforti nasionalismu, sidadania, no hametin liután konsiênsia foin-sa'e sira nian ba sociedade, hametin disciplina moral, kontribui ba halakon dezempregu no redus droga no krime sira ne'ebé iha relasaun ho arte marsiais".⁸

Liña sira ne'e maka PR atual hato'o nu'udar kandidatu iha kampaña política molok hakat ba eleisaun presidencial nian. Iha pontu prinsipál tolu iha rasionalizasaun ida ne'e; defende soberania no integridade territorial, kuda no hametin disciplina no hadok foin-sa'e sira husi halalok krime sira no halakon dezempregu.

Hahu uluk ho pontu dahuluk kona-bá importânsia programa serbisu militar obrigatóriu ne'ebé hanaran fali, eufemistikamente, Sidadania Sívika Patriota. Razaun ida ne'e korresponde duni ho mandatu konstitusional F-FDTL Artigu 146 Konstituisaun RDTL ne'ebé ko'alia momos ona kona-bá funsaun F-FDTL hodi defende soberania no integridade territorial RDTL.⁹

Bainhira ema ida koloka argumentu nune'e signifika iha nasaun balu maka konstitui ameasa ba soberania no integridade territorial RDTL. Tanba, bainhira Estadu ida estabelese planu hodi estabelese postura forsa defeza ida obrigatóriu nune'e signifika Estadu ne'e iha, jeoestratéjikamente, hela iha ameasa konvensional boot balu nia laran. Entaun, se los ka Estadu ne'ebé los maka sai nu'udar ameasa konvensional ba Estadu Timor-Leste? Planu Força 2020 identifika Indonézia nu'udar ameasa externa ida boot¹⁰, maibe, tenki tau iha kalkulasaun estratéjiku katak Indonézia agora la'os ona Indonézia ida iha rejime Soeharto nia okos. Presiza duni rekuiñese katak bele hamosu mudansa lideransa iha Indonézia ka Timor-Leste ne'ebé bele tau iha risku relasaun amigável ne'ebé nasaun rua durante ne'e goja hela. Bele hamosu lideransa foun ne'ebé lakohi hakoi buat dodok sira iha pasadu maibe hakarak lori buat sira ne'e ba iha justisa formal hanesan tribunal internasional. Ne'e bele lori impaktu boot tebes ba dínamika relasaun entre nasaun rua ne'e nian. Bainhira moris ona iha ambiente ida nune'e, nasaun rua bele haree malu nu'udar ameasa konvensional boot ba siguransa. Karik ida ne'e maka nu'udar hanoin ka pensamentu ne'ebé dudu PR hodi hamosu programa Sidadania Sívika Patriota, entaun presiza espika ho klaru iha rasionalizasaun programa ne'e.

⁸ Office of the Presidency, Press Release First Debate on Compulsory Military Service, April 29 2013

⁹ Konstituisaun RDTL Artigu 146

¹⁰ Força 2020, pájina 17 "Types of Threat"

Iha teoria barak ona maka ko'alia kona-bá interaksaun entre política doméstika no política externa. Iha situasaun balu, maski política ne'e internal, política ne'e bele iha implikasaun ba política externa Estadu ida nian, tan deit mundu ne'ebé *interconnected* ba bebeik.¹¹ Tanba ne'e, iha estudu estratéjiku hanorin buat ida katak iha formulasaun política defeza Estadu ida nian presiza hamosu rasionalizasaun ida klaru no koerente, tan bele hamosu impaktu ba política externa estadu ne'e nian. Tan iha *'boundary problem'* ka 'problema fronteira' entre política defeza no política externa.¹² Problema ne'e baibain iha teoria relasaun internasional refere ba buat ida bolu *security dilemma*, ne'ebé signifika katak bainhira Estadu ida tenta atu hadia ka hasa'e nia postura siguransa bele hamosu insiguransa husi Estadu seluk. Entaun, Estadu seluk sira ne'e bele senti ameasadu.¹³ Bainhira mosu insiguransa iha Estadu viziñu sira, esplikaun ne'ebé husi Timor-Leste maka ne'e katak programa Sidadania Sívika Patriota ne'e hodi hametin disiplina no hadok foin-sa'e sira husi lala'ok kriminal sira. Esplikaun ne'e sei laforte naton hodi bele konvense, tan razaun ne'ebé sei esplika tuir mai ne'e.

Razaun seluk hamosu Sidadania Sívika Patriota ne'e maka atu kuda disiplina no hadok joven sira husi hahalok destrutivu sira. Ne'e bele los. Iha militar hanorin duni buat ida disiplina; tenki pontual no disiplina hodi ezekuta orden husi komandante sira. Atu kuda buat sira ne'e iha ema ida nia kakutak, la'os tenki liu deit husi serbisu obrigatóriu militar, buat sira nune'e bele hadia kedas deit husi familia uma-laran, eskola no iha comunidade. Atu muda mentalidade ema ida nian la'os akontese deit iha tinan rua ka tolu nia laran depende ba durasaun serbisu militar obrigatóriu nian, maibe ne'e presiza tempu naruk hahu husi inísiu kedas bainhira ema ne'e se iha inan nia kabun-laran to'o idade boot no moris iha comunidade nia laran. Disiplina militar nian obriga forsa sira hodi hatan "*pronto*" ka babain kritika sira dehan *blind obedience to commands* ba kualker instrusaun sadeit maka mai husi sira-nia superior. Iha mundu la'os militar nian, no tuir formasaun ema ne'ebé lolos hanorin ema atu disiplina maibe iha espasu mos ba argumentasaun ka rasionalizasaun. Ne'e hamosu ona kestaun kona-bá oinsa bele kuda disiplina maibe la hamate jogu kakutak iha argumentasaun ka rasionalizasaun nian? Iha ne'e la'os atu dehan mundu militar nian ne'e la rasional, maibe, aproximasaun militar nune'e bele mos lori impaktu ba foin-sa'e sira ne'e hodi re-integra ba comunidade hafoin hala'o tiha serbisu militar obrigatóriu.

Razaun ida tan kona-bá introdusaun programa Sidadania Sívika Patriota maka atu halakon número dezempregu. Iha problema tolu iha rasionalizasaun ida ne'e. Ida, konsidera fali F-FDTL hanesan SEPFOPE¹⁴. Rua, hanoin katak formasaun forsa defeza ne'e kustu kiik hela no, ikus liu, programa ne'e la interrompe ka la impede foin-sa'e sira nian.

Formasaun atu sai forsa defeza ne'e la'os hanesan formasaun ne'ebé SEPFOPE fo. Maski, durante formasaun iha forsa defeza aprende mos buat oi-oin hanesan lideransa, nsst, maibe, prioridade formasaun sira ne'e halai liu ba oinsa forsa defeza bele sai nu'udar instrumentu Estadu ba funu nian, ne'e maka objetivu prinsipal husi forsa defeza. Los duni, ema hotu-hotu sei empregadu tan deit programa Sidadania Sívika Patriota, maibe, kria

¹¹ Robert Cooper, *The Postmodern State and the World Order* (London: Demos Foreign Policy Institute, 2nd edition, 2000), pp.4-22

¹² Wallace in Samuel Huntington, *The Common Defence, Strategic Programs in National Politics* (Columbia University Press, New York, 1961)

¹³ Herz, John H. *Political Realism and Political Idealism*. Cambridge University Press, 1951.

¹⁴ Sekretaria Estadu Política Formasaun Profesional no Empregu - SEPFOPE

implikasaun boot ida ba iha sustentabilidade ekonomia nasaun nian. Program Sidadania Sívika Patriota ne'e hasa'e deit despeza nasaun nian no sei la sustentável. Iha disiplina formulasaun polítika defeza nian, iha buat prinsipál tolu; interese estratéjiku, postura forsa no aliñamentu planu forsa ho kbiit finanseiru Estadu nian.¹⁵ Atu formula polítika defeza ida koerente no klaru, presiza interaksaun diak entre fator tolu ne'e.

Iha kontekstu Timor-Leste, susar tebe-tebes, karik la'os imposível, atu Estadu ne'e bele sustenta estrutura forsa defeza ida ne'ebé mai husi obrigatóriu. Molok atu tara mehi ne'e aas liu, presiza kompriende situasaun atual. Ohin-loron, iha problema barak no oi-oin iha esforsu dezenvolvimentu F-FDTL atu sai forsa ida ne'ebé professional no konvensional liu-liu problema orsamentu ne'ebé tun ba beibeik ba seitor defeza no siguransa. Ezemplu, iha tinan 2013, orsamentu ba Ministériu Defeza no Siguransa iha deit 0,4%¹⁶, husi total orsamentu ne'ebé kiik tiha ona sei aloka tan ba iha seitor siguransa nsst. Kompara ho Singapura ne'ebé aplika mos serbisu militar obrigatóriu gasta 1/4 husi total despeza Estadu kada-tinan ba seitor defeza.¹⁷ Singapura sai nu'udar nasaun vensedor daruak kona-bá nível gastu iha defeza hafoin Israel.¹⁸ Iha nasaun kiak sira, bainhira defeza boot bele lori impaktu negativu ba dezenvolvimentu seitor prinsipal sira seluk hanesan saúde no edukasaun.¹⁹ Iha ona debate iha nasaun ne'ebé aplika programa ne'e atu halakon tiha programa ne'e tan hasa'e deit despeza nasaun nian. Imposível atu kompara situasaun dezenvolvimentu Timor-Leste ho Singapura ne'ebé avansadu liu ona iha seitor hotu-hotu. Tan ne'e, presiza defini programa ida ne'ebé realístiku ho situasaun real Timor-Leste nian.

Konkluzau

Introdusaun programa Sidadania Sívika Patriota ne'e hases ona kompetênsia Governu nu'udar orgaun ekutivo ne'ebé iha poder tomak hodi define polítika defeza ba Timor-Leste. Los duni katak PR maka Komandante Supremu F-FDTL, maibe, la signifika Komandante Supremu maka iha fali poder ekutivo hodi determina modelu forsa defeza nasaun nian.

Tuir prespetiva ekonomia no experiênsia nasaun sira seluk ne'ebé implementa programa ne'e katak serbisu militar obrigatóriu sei lori implikasaun ekonómiku ida boot tebe-tebes no programa ne'e bele sai fali impedimentu ba dezenvolvimentu seitor prinsipal sira seluk. Iha mundu globalizadu ne'e, diferensa entre polítika externa no interna ne'e mihi tebe-tebes, no kuaze laiha diferensa liu-liu iha impaktu polítika iha rai-laran no rai-liur. Sidadania Sívika

¹⁵Francisco Lemos Dos Santos, *Tansá Timor-Leste Presiza Política Defeza Foun?*, bele asesu: <http://forum-haksasuk.blogspot.com/2012/08/tansa-timor-leste-presiza-politika.html>, artigu nemos publika iha jornal nasional sira.

¹⁶Mahein Nia Lian Nú. 45, 30 Janeiro 2013, *Analiza Orsamentu Jeral Estadu 2013 ba Ministériu Defeza no Siguransa: Prespetiva Sosiedade Sivil*, bele asesu: <http://www.fundasaunmahein.org/2013/01/30/analiza-orsamentu-jeral-estadu-2013-ba-ministeriu-defeza-no-siguransa-prespetiva-sosiedade-sivil/>

¹⁷Sudhir Thomas Vadaketh, Singapore's *outdated national security policies*, bele asesu iha: <http://sudhirtv.com/2012/12/19/singapores-outdated-national-security-policies/>

¹⁸Bonn International Centre for Conversion, *UPDATE: BICC's Global Militarization Index (GMI) 2012*, bele asesu iha: <http://www.bicc.de/old-site/index.php?page=gmi-publications>

¹⁹Bonn International Centre for Conversion, *The Global Militarization Index(GMI), Occasional Paper*, bele asesu iha: <http://www.bicc.de/old-site/index.php?page=gmi-publications>

Patriota bele hamosu serbisu-uma ida ka *“Trabalho Para Casa - TPC”* diplomasia ida defisil tebe-tebes, tan programa ne'e bele provoka preokupasaun no insiguransa.

Programa ne'e iróniku oituan, tan laiha konsistensia entre polítika externa rekonsiliaun ne'ebé Timor-Leste adopta liu-liu ho Indonézia no programa Sidania Sívika Patriota ne'ebé obriga kada Timor oan hotu-hotu atu sai militar. To'o ohin-loron, seidak iha ameasa konvensional ida dramátiku ne'ebé ejji Estadu hodi dada ema hotu tama militar hodi defende soberania no integridade territorial Estadu RDTL. Diak liu, Casa Militar PR hamosu deit planu ida atu halo estudu ida kona-bá importânsia Timor-Leste define polítika defeza foun tan Planu Força 2020 mos lakon tiha ona relevânsia balu iha kontektu ohin-loron.

Bibliografia

Bonn International Centre for Conversion, *UPDATE: BICC's Global Militarization Index (GMI) 2012*, bele assessu iha: <http://www.bicc.de/old-site/index.php?page=gmi-publications>

Bonn International Centre for Conversion, *The Global Militarization Index (GMI), Occasional Paper*, bele assessu iha: <http://www.bicc.de/old-site/index.php?page=gmi-publications>

Dokumentu Força 2020

Francisco Lemos Dos Santos, *Programa V Governu latemi kona-bá política defeza foun ba Timor-Leste!* bele assessu iha: <http://forum-haksasuk.blogspot.com/2012/12/programa-v-governu-latemi-kona-ba.html>

Herz, John H. *Political Realism and Political Idealism*. Cambridge University Press, 1951.

Jornal Independente, Segunda 15 Marsu 2012

Konstituisaun RDTL Versaun Tetum

Lei N.º 2 /2010 de 21 de Abril Lei de Segurança Nacional

Mahein Nia Lian Nú. 45, 30 Janeiru 2013, *Analiza Orsamentu Jeral Estadu 2013 ba Ministériu Defeza no Siguransa: Prespetiva Sosiedade Sivil*, bele asesu: <http://www.fundasaunmahein.org/2013/01/30/analiza-orsamentu-jeral-estadu-2013-ba-ministeriu-defeza-no-siguransa-prespetiva-sosiedade-sivil/>

Office of the Presidency, Press Release First Debate on Compulsory Military Service, April 29, 2013

Planu Estratéjiku Dezenvolvimentu Nasional – PEDN - 2011-2030

Programa V Governo Konstituisional Nian, 2012-2017

Robert Cooper, *The Postmodern State and the World Order* (London: Demos Foreign Policy Institute, 2nd edition, 2000), pp.4-22

Sudhir Thomas Vadaketh, *Singapore's outdated national security policies*, bele assessu iha: <http://sudhirtv.com/2012/12/19/singapores-outdated-national-security-policies/>

Wallace in Samuel Huntington, *The Common Defence, Strategic Programs in National Politics* (Columbia University Press, New York, 1961)